

Script of Evening Gojri News Bulletin 05 December 2024 at 1700 Hrs

ایوننگ گو جری نیوز بلیٹن مور 05 دسمبر 2024

یوہ آکا شوانی جموں بے محمد آصف لودھی تے عبدالرحمان شاہین تیں خبر سَنو۔ پہلاں
خاص خاص خبر۔

- *1. صدر جمہوریہ درویدی مُرمونے ذرعی سائنسدانان ور زور دتو بے جے وے
ذراعت نانہہ مزید طاقت دین واسطے نوی ٹیکنالوجی غا استعمال نانہہ یقینی بناویں۔
- *2. ایوان مانہہ اج حذب اختلاف غی طرفوں شور شرابو کیا جان غا سلسلہ مانہہ ایوان
غی کا روانی نانہہ پورا دن واسطے ملتوی کرنو پیو۔
- *3. جموں کشمیر حکومت نے لوکاں غی شکایتاں غا نمیڑہ غی خاطر وزیر اعلیٰ
شکایتی دفتر قائم کیو بے۔
- *4. بھارتی فوج نے پونچھ ضلع مانہہ سرحد غے نیڑے مشکوک نقل و حرکت نانہہ
دیکھتاں واں گو لی چلائیں۔ اواں کلگام ضلع مانہہ حفاظتی دستاں نے دہشت گرداں نال
منسلک 2 افراد نانہہ حراست مانہہ لے لیو بے۔

خبراں غی تفصیل نال پہلاں محمد آصف لودھی۔

Prez Farmer

صدر جمہوریہ درویدی مُرمونے ذراعی سائنسدانان ور زور دتو بے جے وے موجو
دہ دور مانہہ قدرتی تباہی تے ماحولیاتی تبدیلیاں جیسی للکاراں نال نمٹن غی خاطر
کسانان نانہہ سوکھت پُجان واسطے نوا سائنسی منصوبہ ترتیب دیں۔ اُن نے کہیو جے جدید
ڈرون ٹیکنالوجی، مصنوعی ذہانت، ذراعت سیکٹر مانہہ کسانان غی مدد کرن مانہہ خصیرو
کردار ادا کر رہیا ہیں۔ اج سویرے بھو نیشور اُڑیشہ مانہہ ذراعت تے ٹیکنالوجی با رے
یونیورسٹی مانہہ منعقدہ 40 واں کنو کیشن سنگ خطاب کرتاں واں صدر جمہوریہ نے
ذرعی کسانان ور زور دتو بے کہ وے مٹی غی صحت، ماحول سمیت قدرتی ذریعیاں غو
مکمل طریقہ نال استعمال کرن غی خاطر منصوبہ ترتیب دیں۔ محترمہ مُرمونے یوہ وی
کہیو جے بھارت نے گزری کجھ صدیاں مانہہ ذراعت سیکٹر مانہہ متی ترقی درج کر غے
اناج نانہہ دوجا مُلکاں مانہہ برآمد کیو بے۔ اُن نے کہیو جے بھارت ہُن نوی ٹیکنالوجی غے
ذریعے ذراعت سیکٹر نانہہ متو بابدو دین آلے پاسے آگے بدھے گو۔ اس موقعہ ور مزید
بولتاں واں صدر جمہوریہ نے یوہ وی کہیو جے بھارت ہُن ذراعت غی مدد نال 2047
توڑی ترقی یافتہ بنن غا اپنا مقصد نانہہ پورو کرے گو۔

LS Adjournment

لوک سبھا غو اجلاس دن پہر واسطے ملتوی کر دتو گیو جد کہ بھارتیہ جنتا پارٹی گا
ممبر پارلیمنٹ ریشی کانت دوبے نے کانگریس غا اعلیٰ رہنماواں غے خلاف اور سنبھل
تشدد غا معاملہ ور کجھ الزامات عائد کیا۔ اجلاس سہ پہر 3 بجے دوبارہ شروع ہوؤ تاں
ریلویز غا وزیر اشونی ویشنو نے ریلوے ترمیمی بل 2024 ور جواب دین غی کوشش
کی، تاہم حذب اختلاف غا ممبران نے ہنگامو جاری رکھیو۔ جس غی وجہ تیں اجلاس
پورا دن واسطے ملتوی کر دتو گیو۔ وقفہ صفر غے دوران جناب دوبے نے اک فرانسیسی

اشاعت غی رپورٹ غو حوالو دیتاں واں کہیو جے ایسی طاقت بھارتی پارلیمنٹ اور معیشت نانہ کمزور کرن غی کوشش کر رہی ہیں۔ انہاں نے الزام لایو جے کانگریس غا رہنما بشمول راہل گاندھی اور پرینکا گاندھی اور دیگر حزب اختلاف گا رہنما ایسی رپورٹ نانہ سماجی ذرائع ابلاغ ور پوسٹ کریں۔ کانگریس، ڈی ایم کے اور دوجی جماعتاں غا اراکین نے اک ممتاز کاروباری گروپ غے خلاف رشوت ستانی غا الزامات اور سنبھل تشدد غا معاملہ ور ایوان مانہ ہنگامو کیو۔ ایوان مانہ شو شرابو جاری رہن غے باعث سپیکر نے اجلاس نانہ پیشی 2 بجے تک ملتو کر دتو۔

CM Public Service

جموں کشمیر حکومت نے لوکاں غی شکایات نانہ سنن تے اُن غا نمیڑا غی خاطر وزیر اعلیٰ شکایاتی دفتر قائم کیو ہے۔ واضع رہ جے اس دفتر مانہ شکایات سنن تے اُن غا نمیڑہ غی خاطر افسر مقرر کیا جائیں گا۔ اس سلسلہ مانہ ذریعے نے جانکاری دتی ہے جے شکایات بارے اُن لائین پورٹل قائم کیو جائے گو۔ جس ور لوکاں غی شکایات غا نمیڑہ بارے اُچی سطح غی انتظامیہ نال رجوع کیو جائے گو۔

Law Minister

قانون تے انصاف غا وزیر ارجن رام میگھوال نے اج کہیو ہے جے مرکزی حکومت ڈاکٹر بھیم راؤ امبیڈکر جیسا دور اندیش لیڈر غی اخلاقیات غی حفاظت نانہ یقینی بنان غی وعدہ بند ہے۔ اج نوی دہلی مانہ منعقدہ اک پریس کانفرنس نال خطاب کرتاں واں جناب میگھوال نے کہیو جے 2007 مانہ نوی دہلی مانہ ڈاکٹر بھیم راؤ امبیڈکر غا ناں نال اک بین القوامی مرکز قائم کرن غے نال نال دوجی سکیمیں نانہ عملا غے بھیم راؤ امبیڈکر غا کارنامہ نانہ دُنیا غے باندے آئیو جا رہیو ہے۔ اُن نے کہیو جے ڈاکٹر امبیڈکر نہ چھڑا سماجی باختیاری غا لیڈر تھا۔ بلکہ اُن غی طرفوں تیار کی گئی رپورٹ غی مدد نال بھارت مانہ مالی کمیشن قائم کرن غی مدد لبی تھی۔ اُن نے کہیو جے ڈاکٹر بھیم راؤ امبیڈکر غی لکھی گئی ”دا پرابلم آف روپی“ نامی کتاب بھارتیہ ریزرو بینک غا قیام مانہ متی مددگار ثابت ہوئی تھی۔ جناب میگھوال نے کانگریس جماعت ور الزام لاتاں واں کہیو جے اُس غا دور حکومت مانہ ڈاکٹر بھیم راؤ امبیڈکر جیسا دور اندیش لیڈر غی مُلک واسطے کی گئی خدمات نانہ نظر انداز کیو گیو۔

RNU's Raising Day

آکاشوانی جموں غا خبراں آلا علاقائی یونٹ غی طرفوں 6 دسمبر 2024 نانہ اپنو 54 ووں یوم قیام منایو جائے گو۔ یوم قیام غا اس موقعہ ور خبراں آلا علاقائی یونٹ یعنی آر این یو غی طرفوں سویرے ساڈھا 9 بجے 30 منٹ غو اک خصوصی پروگرام نشر کیو جائے گو۔ جس مانہ آر این یو غا سابقہ افسراں تے خبر پڑھن آلاں غی بات چیت تے انٹرویو نشر کیا جائیں گا۔ اس غے علاوہ شام 7 بجے وی 15 منٹاں ور مبنی اک ہور خصوصی پروگرام نشر کیو جائے گو۔ جس مانہ خبراں آلا یونٹ غا مجموعی طور کم کاج غا طریقہ بارے دسن غے نال نال یوم قیام گا موقعہ ور جموں خطہ غی نامور معزز شخصیات غا مبارکبا تے نیک خواہشات آلا پیغام وی شامل کیا جائیں گا۔ اس یادگاری تہاڑا غا موقعہ ور آر این یو غی طرفوں اپنا عملہ غی قابل و بہترین خدمات بارے اُن غی عزت افزائی وی کی جائے گی۔ تانجے اُن گا مستقبل نزدیک غا پیشہ وارانہ ہنر تے

جذبہ نانہہ تقویت مل سکے۔ ڈوگری شاعر، بھارت پاک جنگ غا ہیرو تے پدم شری نار سنگھ دیو جموال جہڑا کہ مہارا سامعین وچوں اک ہیں نے خبراں آلا علاقائی یونٹ غا 54 واں یوم قیام غا موقعہ ورا آر این یو نانہہ مبارکباد پیش کی ہے۔ اور اپنی نیک خواہشات غو اظہار کیو ہے، اُنہاں نے اس طرح کہیو۔۔۔بائٹ،...یوم قیام غا موقعہ ورا آر این یو غی طرفوں اپنا عملہ غی بکھ بکھ زمران مانہہ عزت افزائی و حوصلہ افزائی کی جائے گی۔ جس طرح کہ بہترین نیوز ایڈیٹر، ڈوگری زبان مانہہ بہتر خبر پڑھن آلا و ترجمو کرن آلا، گوجری زبان مانہہ بہترین خبر پڑھن آلا و ترجمو کرن آلا، بہترین ضلع نامہ نگار تے بہترین عام زمرہ گو عملو شامل ہے۔ اس غے علاوہ پارلیمانی انتخابات 2024 تے جموں کشمیر اسمبلی غا عام انتخابات 2024 غے دوران خصوصی فرائض سرانجام دین بارے تعینات کیا گیا عملہ غی خدمات نانہہ وی سراہیو جائے گو۔ تے اس یادگار تہاڑہ گا موقعہ ورا عملہ نانہہ قابلیت سرٹیفکیٹ وی دتا جائیں گا۔ سابقہ پروفیسر تے پدم شری اور مہارا سامعین وچوں اک پروفیسر شیو نرموبی نے 54 واں یوم قیام غا موقعہ ورا آر این یو نانہہ مبارکباد پیش کی ہے تے اپنی نیک خواہشات غو اظہار کیو ہے۔ اُنہاں نے اس طرح کہیو۔۔۔بائٹ۔۔۔

MEA Bharat Summit

خارجی معاملن غا وزیر ڈاکٹر ایس جے شنکر نے کہیو ہے جے بھارت دوجی اقتصادیات واسطے چھڑو صارفی منڈی نہیں بننو چاہتو۔ اج نوی دہلی مانہہ ”بھارت ایٹ ہنڈرڈ“ نامی اجلاس سنگ اپنا خطاب مانہہ جناب شنکر نے کہیو ہے جے عالمی انبار تے صنعت بھارت مانہہ نہ چھڑی تجارت واسطے آرہی بلکہ یہ اس غا ہنر مانہہ وی باندے لیان مانہہ مددگار ثابت ہو رہی ہے۔ اس اجلاس غے دوران چین بارے بولتاں واں خارجی وزیر نے کہیو جے بھارت چین نال مضبوط تجارتی رشتہ غو خواہش مند ضرور ہے ورا اس ورا منحصر نہیں رہنو چاہتو۔ روس تیں برآمدگی ورا بولتاں واں اُن نے کہیو جے یورپی ممالک قدرتی ذریعے غا طور ورا اسٹریلیا، برازیل تے انڈونیشیا بھروسے مند شراکت دار ہیں۔ جد کہ بھارت مانہہ قدرتی ذریعے غی کمی ہے۔ اجلاس غے دوران بولتاں واں ڈاکٹر ایس جے شنکر نے کہیو جے بھارت دوا سازی، ذراعت سمیت دوجا لوڑتا سامان غی خاطر روس نال کاروبار مانہہ متوسدھا ر لیان غی خاطر کوشش کر رہیو ہے۔

مزید خبراں نال عبدالرحمان شاہین لیکن اُس تیں پہلاں یوہ سنیہو۔
یہ خبر تم آکاشوانی جموں تیں سُن رہیا ہیں۔ تے خبر تم آکاشوانی غی ویب سائٹ

newsonair.gov.in

تے آکاشوانی گی ایپ تے ڈی ٹی ایچ ورا وی سُن سکیں۔

Poonch Ambush

بھارتی فوج نے سرحدی ضلع پونچھ مانہہ سرحد غے نیڑے بگیال دھڑہ گراں مانہہ کُجھ مشکوک نقل و حرکت دیکھتاں واں گولی چلائیں۔ جس تیں بعد فوج نے پورا علاقہ غی کھیرا بندی کر غے چوکسی نال تلاشی کا روانی شروع کر دی ہیں۔ اس سلسلہ مانہہ ذریعے نے جانکاری دی ہے جے فوج غی طرفوں چلائی گئی گولیاں غے دوران کسے وی جا نی یاہ مالی نقصان غی کا نے خبر نہیں ہے۔ تے مزید تفصیلات غی اجوں اڑیک ہے۔

Security Forces

حفاظتی دستاں نے وادی کشمیر غا کلگام ضلع غا قاضی گنڈ علاقہ تیں دہشت گرداں نال منسلک 2 افراد نانہہ گرفتار کیو ہے۔ جن گا قبضہ تیں متی تعداد مانہہ گولی سیکو برآمد کیو ہے۔ اس سلسلہ مانہہ سرکاری ذریعہاں نے جانکاری دتی ہے جے حفاظتی دستاں غی طرفوں لوور منڈا غا مقام ور ناکہ بندی غے دوران حراست مانہہ لیا گیا افراد تیں اے کے 47 غی 2 ہندوق، تے 4 میگزین ضبط کی ہیں۔ حراست مانہہ لیا گیا افراد غی پشان منظور احمد بھٹ ولد رشید بھٹ تے الطاف احمد لون ولد عبدال آحد لون غا طور ور کی گئی ہے۔ اس سلسلہ مانہہ معاملو درج کر غے تحقیقات شروع کر دتی ہے تے مزید تفصیلات غی اجوں اڑیک ہے۔

Naidu Airport

سول ہوا بازی بارے محکمہ گا وزیر کنجراپورام موبن نا نڈو غو کہنو ہے جے ملک مانہہ اس ویلے 157 ہوائی اڈھا کم کر رہیا ہیں۔ اج لوک سبھا مانہہ ضمنی سوالاں غو جواب دیتاں واں اُن نے کہیو جے سال 2014 مانہہ ملک مانہہ چھڑا 74 ہوائی اڈھا ہی کم کریں تھا۔ جن نانہہ بِن وزیراعظم نریندرمودی غی سربراہی آلی حکومت نے متو بابدو دے غے بِن ہوائی اڈھاں غی تعداد 157 کر دتی ہے۔ اُن نے کہیو جے ”اڑے دیش کا نا گریک“ تے ”اڑان“ اسکیمماں نے سول ہوا بازی بارے سیکٹر مانہہ اک نوو انقلاب آئیو ہے۔ لوک سبھا مانہہ اج سوالاں غو جواب دیتاں واں جناب نا نڈو نے مزید جانکاری دتی ہے جے روزانہ غی بنیاد ور 5 لکھ غے قریب بھارتی مسافر جہاز غے ذریعے آپنو سفر کریں۔

Junior Asia Cup Hockey

مرداں گا ہاکی جو نیر ایشیا کپ 2024 مانہہ بھارتی ہاکی ٹیم نے مستقط عمان مانہہ اپنا روایتی حریف پاکستان نانہہ 3/5 سنگ شکست دتی ہے۔ اس جیت سنگ بھارت نے اس ٹورنامنٹ مانہہ اپنی 5 ویں فتح غو ٹائٹل حاصل کیو ہے۔ اس تیں پہلاں بھارت نے 2002/2008/2015 تے 2023 مانہہ یوہ فتحی تاج جتیو تھو۔ بھارت واسطے ارانے جیت سنگھ ہندال نے 4 گول کر غے اپنی ٹیم نانہہ فتح دوائی۔ جد کہ دلراج سنگھ نے اک گول کیو۔ پاکستان غی طرفوں سفیان خان نے 2 تے ہنان شاہد نے اک گول کیو۔ وزیر اعظم نریندرمودی نے مرداں غی بھارتی جو نیر ہاکی ٹیم نانہہ جو نیر ایشیا کپ 2024 ٹائٹل جتن ور مبارکباد دتی ہے۔ سماجی ذرائع ابلاغ ور اپنا اک پیغام مانہہ وزیر اعظم نے اس نانہہ بھارتی ہاکی واسطے اک تاریخی لمحو قرار دتو ہے۔ اُنہاں نے مزید کہیو جے نوجوان کھلاڑیاں غی غیر منزل محنت، مہارت اور شاندار ٹیم ورک نے اس جیت نانہہ کھیڈاں غی تاریخ مانہہ درج کر دتو ہے۔ وزیر اعظم نے نوجوان چمپئنز ور فخر غو اظہار کیو تے اُن غا مستقبل واسطے نیک خواہشات پیش کی ہیں۔

اس غے نال ہی خبراں غو یوہ بلیٹن ختم ہوؤ۔